



Broj/Број: 01/2a-50-1-2-11/07
Sarajevo/Сарајево, 30.07.2007.

ZAPISNIK

11. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 30.07.2007. godine

Sjednica je počela u 14 sati i vodio ju je predsjednik Komisije Slavko Matić. Sjednici su prisustvovali sljedeći članovi Komisije: Slavko Matić, Sadik Ahmetović, Sefer Halilović, Azra Alajbegović, Milorad Živković te Merdžana Iglica – sekretar Komisije. Odsutni su bili Azra Hadžiahmetović i Milica Marković dok su svoje odsustvo sa sjednice najavili Denis Bećirović i Husein Nanić.

Sjednici su prisustvovali i pozvani gosti i predstavnici predlagača: Biljana Čamur i Pandurević Miodrag, ispred Ministarstva civilnih poslova BiH, Radić Drago, ispred Ministarstva odbrane BiH, Dijana Taborin, savjetnica u uredu Predsjedavajućeg Predsjedništva BiH Željka Komšića, Lejla Somunović, ispred Ministarstva sigurnosti BiH, Sabrija Šerifović, ispred Ministarstva spoljne trgovine i ekonomskih odnosa BiH, Miroljub Krunić, ispred Ministarstva finansija i trezora BiH i Radomir Bogdanović, ispred Ministarstva vanjskih poslova BiH.

Odsutan je bio izvijestilac i predstavnik Ministarstva transporta i komunikacija BiH. Zapisnik su vodili Merdžana Iglica i studenti - stažisti Isović Lejla i Mirjana Brčkalo.

Predsjednik Komisije je najprije otvorio raspravu o dnevnom redu i predložio da se prihvati sugestija Kolegija Zastupničkog doma Parlamentarne skupštine BiH a to je da se u dnevni red uvrsti Sporazum između Bosne i Hercegovine i Republike Litvanije o unapređenju i zaštiti investicija.

Potom je predsjednik Komisije predložio sljedeći

DNEVNI RED

- 1) Verificiranje Zapisnika 9. i 10. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 03. i 04.07.2007.godine;
- 2) Davanje suglasnosti za ratificiranje:
 - a. Sporazuma o zračnom saobraćaju između BiH i Islamske Republike Pakistan (Predlagatelj: Ministarstvo transporta i komunikacija BiH);
 - b. Sporazuma između BiH i Švicarske Konfederacije o policijskoj suradnji u borbi protiv kriminala (Predlagatelj: Ministarstvo sigurnosti BiH);
 - c. Okvirnog sporazuma između Vijeća ministara BiH i Vlade Republike Turske o suradnji na vojnim poljima obuke, tehnike i nauke (Predlagatelj: Ministarstvo obrane BiH);
 - d. Sporazuma o suradnji između Vijeća Ministara BiH i države Kuvajt u oblasti kulture, informiranja, nauke i obrazovanja (Predlagatelj: Ministarstvo civilnih poslova BiH);

- e. Ugovora između BiH i Republike Hrvatske o dvojnem državljanstvu (Predlagatelj: Ministarstvo civilnih poslova BiH);
 - f. Kreditnog sporazuma između BiH i OPEK Fonda za međunarodni razvoj- Projekat unapređenja ruralnog poduzetništva (Predlagatelj: Ministarstvo financija i trezora BiH);
 - g. Ugovora o financiranju – Projekat sanacije puteva u Federaciji BiH - između BiH i Evropske investicione banke (Predlagatelj: Ministarstvo finansija i trezora BiH);
 - h. Sporazuma između Bosne i Hercegovine i Republike Litvanije o unapređenju i zaštiti investicija (Predlagatelj: Ministarstvo spoljne trgovine i ekonomskih odnosa BiH);
- 3) Informacija o finansijskim - kreditnim sporazumima BiH upućenih u postupak ratificiranja, koju je sačinilo Ministarstvo vanjskih poslova BiH na zahtjev Komisije i lista kreditnih sporazuma i ugovora o zaduženju BiH iz raznih oblasti koji su potpisani, ali ne i ratificirani, koju je sačinilo Ministarstvo financija i trezora BiH (Materijal Vijeća ministara BiH – za informaciju);
- 4) Izvještaj o posjeti zamjenice ministra vanjskih poslova BiH, gđe Ane Trišić - Babić, Maroku (Materijal Ministarstva vanjskih poslova BiH – za informaciju);
- 5) Pismo međudruštvenog odbora hrvatskih udruga i ustanova Republike Argentine, upućeno Povjerenstvu za vanjske poslove ZD PSBiH;
- 6) Informacija Misije BiH pri EU u Briselu o 9. Interparlamentarnom sastanku EP- PS BiH, Brisel, 28.06.2007;
- 7) Izvještaj o učešću u radu sedmog globalnog foruma o izgradnji povjerenja u vlade, Beč, 25.-29. juni 2007;
- 8) Zabilješka sa seminara u organizaciji NDI-a BiH, održanog 18.06.2007.godine;
- 9) Radni prijedlog moguće Power point prezentacije Komisije za vanjske poslove Zastupničkog doma PSBiH (materijal sačinila tajnica Komisije i studenti-stažisti NDI-a, Lejla Isović i Mirjana Brčkalo);
- 10) Tekuća pitanja (prijedlog pisma upućenog Misiji OSCE-a u BiH sa molbom za nabavku laptopa za efikasniji rad Komisije).

Izmijenjeni dnevni red je jednoglasno usvojen.

Ad.-1. Verificiranje Zapisnika 9. i 10. sjednice Komisije za vanjske poslove Zastupničkog doma Parlamentarne skupštine Bosne i Hercegovine, održane 03. i 04.07.2007.godine;

Nije bilo rasprave i primjedbi i zapisnik je jednoglasno prihvaćen.

Ad.-2. Davanje saglasnosti za ratificiranje:

a) Sporazuma o zračnom saobraćaju između BiH i Islamske Republike Pakistan (Predlagatelj: Ministarstvo transporta i komunikacija BiH);

Ova točka dnevnog reda nije razmatrana na sjednici Komisije zbog odsustva izvjestioca nadležnog ministarstva.

b) Sporazuma između BiH i Švicarske Konfederacije o policijskoj suradnji u borbi protiv kriminala (Predlagatelj: Ministarstvo sigurnosti BiH);

Izjavitelj iz nadležnog ministarstva, gđa. Lejla Somunović, je istakla da se radi o tipskom sporazumu koji detaljnije definiše suradnju između dvije države. Sporazum je potpisan 24.aprila 2007. godine u Bernu između BiH i Švicarske Konfederacije sa namjerom da se doprinese razvoju međudržavnih odnosa u suzbijanju i spriječavanju kriminala, posebno organizovanog, zatim terorizma i njegovog finansiranja, trgovine ljudima, itd.

Potom je jednoglasno data suglasnost za ratificiranje ovog Sporazuma.

c) Okvirnog sporazuma između Vijeća ministara BiH i Vlade Republike Turske o suradnji na vojnim poljima obuke, tehnike i nauke (Predlagatelj: Ministarstvo obrane BiH);

Predsjednik Komisije g. Slavko Matić je dao riječ izvjestiocu iz nadležnog Ministarstva.

G. Radić Drago je istakao da je Sporazum između Bosne i Hercegovine i Vlade Republike Turske, kao članice NATO-a, potpisan 14.08.2006. godine u Sarajevu i 01.02.2007. godine u Ankari. Potpisivanje je inicirala Vlada Republike Turske kako bi se ozvaničila dosadašnja suradnja na tom planu. Naime, ugovorne strane naglašavaju potrebu za unapređenjem postojećih prijateljskih odnosa na osnovu međunarodnih pravila i Sporazuma. Svrha ovog Sporazuma jeste da položi temelj za odnose koji treba da se uspostave u područjima vojne obuke, tehnologije i nauke. Nadležni organi za implementaciju ovog Sporazuma su na turskoj strani, Generalštab Republike Turske a na strani BiH, Ministarstvo odbrane BiH. Stoga nadležno Ministarstvo predlaže da se da suglasnost za ratificiranje.

G. Matić je otvorio raspravu po ovoj tački dnevnog reda. Pošto nije bilo pitanja niti primjedbi predložio je da Komisija da suglasnost za ratificiranje ovog sporazuma. Svi prisutni članovi su bili za.

d) Sporazuma o suradnji između Vijeća Ministara BiH i države Kuvajt u oblasti kulture, informiranja, nauke i obrazovanja (Predlagatelj: Ministarstvo civilnih poslova BiH);

Gđa. Biljana Čamur, izvjestilac iz Ministarstva civilnih poslova BiH, je istakla da se radi o sporazumu koji ima za cilj da ojača prijateljske odnose i međudržavnu saradnju u oblasti kulture, nauke i obrazovanja. Sporazum je potpisan u Kuvajtu 21.06.2006. godine. Pored razmjene muzičkih, pozorišnih predstava, kao i predstava u oblasti vizualne umjetnosti, ugovorne strane obezbjeđuju potrebnu pomoć za održavanje sedmica kulture i razmjenu umjetničkih grupa, zatim, unapređuju i potpomažu saradnju između univerziteta, institucija visokog obrazovanja i tehničkih i kulturnih centara obje zemlje, unapređuju i potpomažu saradnju u oblasti radija i TV i obezbjeđuju potrebna sredstva za tu namjenu... Također se predviđa formiranje Zajedničke komisije, čiji bi se članovi sastajali svake tri godine.

Svi prisutni članovi Komisije su bili za da se da suglasnost za ratificiranje ovog Sporazuma.

e) Ugovora između BiH i Republike Hrvatske o dvojnem državljanstvu (Predlagatelj: Ministarstvo civilnih poslova BiH);

G. Matić, je odmah dao riječ izvjestiocu iz Ministarstva civilnih poslova BiH.

G. Pandurević je potom istakao da se pregovori po ovom pitanju vode već duže vrijeme i da ovaj ugovor rješava bitna vitalna pitanja između naših državljana i državljana Republike Hrvatske. Dakle, ugovorne strane su se saglasile da državljani Bosne i Hercegovine, odnosno Republike Hrvatske mogu sticati i državljanstvo druge ugovorne strane na način i u postupku utvrđenom propisima ugovornih strana. G. Pandurević je podsjetio članove Komisije da je Predsjedništvo Bosne i Hercegovine na 11. sjednici održanoj 27. marta 2007. godine prihvatilo navedeni ugovor i za njegovo potpisivanje ovlastilo, Sredoja Novića, ministra civilnih poslova BiH.

Član komisije, g. Živković, je postavio pitanje izvjestiocu, da li se radi o tipskom ugovoru te da li se on odnosi podjednako na sve državljane Bosne i Hercegovine, bez obzira na etničku pripadnost, na šta je izvjestilac potvrdno odgovorio.

Svi članovi Komisije su bili za davanje suglasnosti za ratificiranje ovog Ugovora.

f) Kreditnog sporazuma između BiH i OPEK Fonda za međunarodni razvoj - Projekat unapređenja ruralnog poduzetništva (Predlagatelj: Ministarstvo finansija i trezora BiH);

I kod ove točke dnevnog reda, g. Matić, se odmah obratio izvjestiocu iz nadležnog Ministarstva, i zamolio za njegovo uvodno izlaganje.

Prema riječima g. Krunića, Sporazum između BiH i OPEC Fonda za međunarodni razvoj, služiti će za unapređenje mehanizma povezivanja poljoprivrednih proizvođača sa tržištem. S obzirom da su države članice OPEC-a svjesne potrebe za solidarnošću između svih zemelja u razvitku i svjesne važnosti finansijske saradnje između njih i ostalih zemalja u razvitku, osnovala su Fond da bi pomogle potonjim zemljama po povoljnim uvjetima, kao što je slučaj i sa pomoći BiH.

Svi članovi Komisije za vanjske poslove su bili za davanje suglasnosti za ratificiranje ovog Sporazuma.

g) Ugovora o finansiranju – Projekat sanacije puteva u Federaciji BiH - između BiH i Evropske investicione banke (Predlagatelj: Ministarstvo finansija i trezora BiH);

G. Krunić, se obratio članovima Komisije i po ovoj tački dnevnog reda. Naglasio je da se u ovom slučaju radi o ugovoru vrijednom preko 180 miliona eura, a sve u cilju unapređenja putne strukture u BiH. Svi uslovi su ispunjeni za davanje suglasnosti i zbog toga predlaže da Komisija da pozitivno mišljenje po ovom ugovoru.

Gđa. Alajbegović, je potom postavila pitanje da li već postoji projektna dokumentacija, plan realizacije, o kojim putevima se tačno radi kao i o predviđenim regijama. Zatim se osvrnula na saobraćajnu infrastrukturu u BiH, za koju kaže da je katastrofalna, bez obzira što postoje stalna ulaganja u tom polju kao i milionski krediti. Predsjednik Komisije je iznio svoj stav povodom izlaganja gđe Alajbegović, rekavši da se u ovom slučaju radi o projektnoj sanaciji puteva u FBiH, te bi s tim u vezi navedeni entitet trebao rješavati ovo pitanje. Izrazio je svoju nedoumicu kada je u pitanju uloga države u ovom projektu s obzirom da će veći broj projekata završiti na lokalnom nivou.

Izvjestilac iz nadležnog Ministarstva je naglasio da je država BiH, po ovom Ugovoru, glavni dužnik. Sva zaduženja entiteta ostvaruju se ugovorom između Vijeća Ministara i međunarodnog aktera i zbog toga još jednom dodao da, bez obzira što se projekat odnosi na FBiH, Vijeće Ministara se smatra glavnim dužnikom. Na pitanje gđe. Alajbegović, g. Krunić je odgovorio da postoji projektna dokumentacija, po kojoj je i izvršen proračun vrijednosti. Složio se sa primjedbama članova Komisije, ali je i podsjetio da Ministarstvo finansija i trezora ne može rješavati ove pojedinosti s obzirom da to ne spada u njegovu nadležnosti. Također je istakao da se 2011. godina, predviđa kao godina za okončanje finansiranja ovog projekta. Zatim se osvrnuo na izvore finansiranja, te je napomenuo da će entitet finansirati 1,8 miliona eura, kredit od Banke će iznositi 50 miliona eura a finansijsko učešće drugih međunarodnih finansijskih institucija je 48,2 miliona eura.

Četiri člana Komisije su bila za davanje saglasnosti za ratificiranje, dok je g. Halilović bio suzdržan.

h) Sporazuma između Bosne i Hercegovine i Republike Litvanije o unapređenju i zaštiti investicija (Predlagatelj: Ministarstvo spoljne trgovine i ekonomskih odnosa);

G. Šerifović je informisao prisutne članove Komisije o Sporazumu između BiH i Republike Litvanije o unapređenju i zaštiti investicija, potpisanom 07.06. 2007.godine, u Sarajevu. Naglasio je da se u ovom slučaju radi o sporazumu identičnom sporazumima koje je BiH bilateralno zaključila sa drugim zemljama, u oblasti jačanja ekonomske saradnje. Sporazum je potpisan u namjeri da se stvaraju i održavaju povoljni uslovi za veće investiranje investitora jedne ugovorne strane na teritoriji druge ugovorne strane. Naglasio je da su ugovorne strane ravnopravne, u smislu da se ne daje primat jednoj

strani u odnosu na drugu. Sporazum je prošao svu zakonom predviđenu proceduru te je g. Šerifović predložio da se da saglasnost za njegovo ratificiranje. Svi članovi Komisije su bili za davanje suglasnosti za ratificiranje ovog sporazuma.

Ad.-3. Informacija o financijskim - kreditnim sporazumima BiH upućenih u postupak ratificiranja, koju je sačinilo Ministarstvo vanjskih poslova BiH na zahtjev Komisije i lista kreditnih sporazuma i ugovora o zaduženju BiH iz raznih oblasti koji su potpisani, ali ne i ratificirani, koju je sačinilo Ministarstvo financija i trezora BiH (Materijal Vijeća ministara BiH – za informaciju);

Informacija je primljena na znanje bez rasprave.

Ad.-4 Izvještaj o posjeti zamjenice ministra vanjskih poslova BiH, gđe Ane Trišić-Babić, Maroku (Materijal Ministarstva vanjskih poslova BiH – za informaciju);

Informacija je primljena na znanje. Potom je gđa Merdžana Iglica, sekretar Komisije za vanjske poslove, predložila da se donese zaključak o upućivanju inicijative prema Ministarstvu vanjskih poslova o zaključivanju sporazuma o saradnji između parlamenta Maroka i PSBiH te da se osnuje grupa prijateljstva za saradnju sa Marokom i uputi poziv predsjednicima Predstavničkog doma i Senata za posjetu BiH.

Ad.-5. Pismo međudruštvenog odbora hrvatskih udruga i ustanova Republike Argentine, upućeno Povjerenstvu za vanjske poslove ZD PSBiH;

Informacija je primljena na znanje bez rasprave.

Ad.-6. Informacija Misije BiH pri EU u Briselu o 9. Interparlamentarnom sastanku EP-PS BiH, Brisel, 28.06.2007;

Informacija je primljena na znanje bez rasprave.

Ad.-7. Izvještaj o učešću u radu sedmog globalnog foruma o izgradnji povjerenja u vlade, Beč, 25.-29. juni 2007;

Informacija je primljena na znanje bez rasprave.

Ad.-8. Zabilješka sa seminara u organizaciji NDI-a BiH, održanog 18.06.2007.godine;

Informacija je primljena na znanje bez rasprave.

Ad.-9. Radni prijedlog moguće Power point prezentacije Komisije za vanjske poslove Zastupničkog doma PSBiH (materijal sačinila tajnica Komisije i studenti-stažisti NDI-a, Lejla Isović i Mirjana Brčkalo);

Sekretar Komisije, gđa. Merdžana Iglica je prezentovala radni prijedlog moguće Power point prezentacije. Gđa. Alajbegović, je pohvalila prezentaciju, ali isto tako istakla da se treba fokusirati na one dijelove koji su objektivno izvodljivi. S tim u vezi, je podržala prijedlog o izradi publikacija, koje bi služile parlamentarcima i članovima Komisije prilikom njihovih posjeta inostranstvu, u svrhu što boljeg predstavljanja Bosne i Hercegovine kao i njenih najviših institucija. Posebnu pažnju u tom smislu, po mišljenju gđe Alajbegović, trebalo bi usmjeriti na DKP mrežu, zbog popunjavanja radnih mjesta u skorije vrijeme, u ovim predstavništvima. Zbog toga bi bilo od izuzetnog značaja uspostaviti odnose za DKP-om, prije odlaska diplomatskih predstavnika BiH u misiju, kao i održavanje sastanaka i susreta sa DKP-ovim osobljem. Zatim je iznijela prijedlog da se Komisija obrati MIP-u sa zahtjevom da se DKP-ima BiH u inostranstvu pošalju brošure o zemlji.

Ad.-10. Tekuća pitanja (prijedlog pisma upućenog Misiji OSCE-a u BiH sa molbom za nabavku laptopa za efikasniji rad Komisije).

Informacija je primljena na znanje bez rasprave

Sjednica je završila svoj rad u 16 sati.

SEKRETAR
KOMISIJE ZA VANJSKE POSLOVE
Merdžana Iglica

PREDSJEDNIK
KOMISIJE ZA VANJSKE POSLOVE
Slavko Matić

Kopija: MVP-u BiH